

# POST Greenlandip allakkanik ingerlassisarnermi pisussaaffii kisermaassisussaataaneralu il.il. pillugit Namminersorlutik Oqartussat nalunaarutaat

Allakkerineq pillugu Inatsisartut inatsisaanni nr. 3, 15. april 2011-imeersumi §§ 3, 4, 6, 10, aamma 16 naapertorlugit aalajangersarneqarput

## Kapitali 1

### *Atuuffia aamma nassuiaassutit*

§ 1. Nalunaarummi matumani POST Greenlandip ingerlassinermi pisussaaffiisa, nassiussanik aalajangersimasunik ingerlassinissamut kisermaassinera kiisalu allakkanik ingerlatitseqqittarnermi, allakkanik ammaasarnermi, allakkerinermi sullissiviit ataqatigiit ingerlannerini, allakkanik nakkartitsivinnik il.il. atuinerani, tunniussisarnernani, maalaaruteqarsinnaanermi, taarsiissuteqartarnermi niunernermilu piumasaqaatini pisinnaatitaaffiisa pisussaaffiisalu maleruagassiuunneqarnissaat siunertarineqarpoq.

§ 2. Allakkat nalinginnaasut allakkanut A-nut (timmisartukkut nassiussanut), allakkanut B-nut (umiarsuakkut nassiussanut) aamma tappiitsunut nassiussanut, nassiunneqarnerminni nassiuseriaatsimik immikkut ittumik atuiffiunngitsunut ataatsimut taaguutaavoq.

*Imm. 2.* Poortukkat nalinginnaasut poortukkanut, nassiunneqarnerminni nassiuseriaatsimik immikkut ittumik atuiffiunngitsunut ataatsimut taaguutaavoq.

*Imm. 3.* Tammatsaalisat tassaapput nassiussat suulluunniit allakkerivimmut tunniunneqarnerminni nassiussap taamaallaat tiguisussamit taassumaluunniit piginnaatitaanit, uppernarsaammik naleqquttumik takutitsinnaasumit tiguneqarnissaanik, aammalu nassiussap allakkanut nalilinnut ilanngullugu assartorneqarnissaanik uppernarsaasiiffusut.

*Imm. 4.* Nassiussat nalilerneqartut tassaapput nassiussat, nalingat quppernermi najukkap allassimaffianni koruuninngorlugit oorinngorlugillu allanneqartut. Nalingisa aningaasartaasa annerpaaffissaat POST Greenlandip niuernermi piumasaqaataanni nalinginnaasuni aalajangersarneqarsimapput.

*Imm. 5.* Poortukkat qaatiguuliorneqartut tassaapput nassiussat, karsinngorlugit, imusanngorlugit imaluunniit amitsukujuunngorlugit poorneqarsimasut, minnerpaaffissaannik annerpaaffissaannillu, POST Greenlandip niuernermi piumasaqaataanni aalajangersarneqarsimasunik malinniffusut.

*Imm. 6.* Allakkerinermi sullissivimmik illoqarfimmi nunaqarfimmiluunniit peqarnerani allakkerinermi sullississutinik atuisoqarsinnaavoq, allakkanik ingerlassisoqarsinnaavoq kiisalu tunniussisoqarsinnaalluni. Allakkerinermi sullissiveqarfik sumiiffimmi aalajangersimasumi inissisimasuusariaqanngilaq, kisianni

aamma tassaasinnaalluni elektroniskimik aaqqiissutaasoq. Allakkerinermi sullissivik ataqatigiissoq tassaavoq allakkerinermi sullissiviit sumiiffinitu ataatsimoortumik taaguutaasoq aammalu tassaasinnaalluni allakkeriviit, elektroniskimik aaqqiissutaasut aammalu suliaqartut allat suleqatigalugit aaqqiissutaasut.

## Kapitali 2

*POST Greenlandip ingerlassisussaatitaanera, agguaassisussaatitaanerat aamma kisermaassisussaatitaanera*

§ 3. POST Greenland pisussaavoq nuna tamakkerlugu allakkanik ingerlassinissaminut atatillugu nassiussinerit makku qulakkiissallugit:

1) Allakkat qaatiguuliorneqarsimasut.

2) Poortukkat qaatiguuliorneqarsimasut.

*Imm. 2.* Nunap iluani allakkat qaatiguuliorneqarsimasut tammatsaalisatut imaluunniit nalinga nalunaarutigalugu ingerlanneqarsinnaassapput.

*Imm. 3.* Nunap iluani poortukkat qaatiguuliorneqarsimasut nalinga nalunaarutigalugu ingerlanneqarsinnaassapput.

*Imm. 4.* Poortukkat nunanit allaniit POST Greenland aqutugalugu Kalaallit Nunaata iluani ingerlateqqinneqartussatut nassiunneqartut, POST Greenlandip saniatigut assartuussisoq alla atorlugu Kalaallit Nunaannut assartorneqartut immikkut akeqartinneqarsinnaapput.

*Imm. 5.* Danmarkimut, Savalimmiunut aamma nunanut allanut taakkunangaanniillu nassiussanik ingerlatsisussaannermi nunat tamat akornanni suliaqartimut isumaqatigiissutaat eqqarsaatigineqassapput.

*POST Greenlandip agguaassinissamut pisussaaffeqarnera*

§ 4. Sapaatit akunnerannut minnerpaamik marloriarluni aalajangersimasumik agguaassisarnissamut POST Greenland immikkut ittumik akuerineqarsimangippat, takuuk imm. 3, allakkanik nalinginnaasunik agguaassisarneq illoqarfinni ingerlanneqartarpoq. Allakkanik nalinginnaasunik agguaassineq sapaatit akunnerani ulloq suna pissanersoq POST Greenlandip aalajangersassavaa.

*Imm. 2.* Nunaqarfinni allakkanik nalinginnaasunik agguaassisoqarneq ajorpoq.

*Imm. 3.* Naalakkersuisut POST Greenlandip qinnuteqarneratigut sullitatigut tunngaviusut ingerlatsinermilu aningaasaqarnikkut eqqarsaatersuutit tunngavigalugit illoqarfinni agguaassinissamut pisussaaffeqarnermik saneqqutsisinnaanermut akuersissuteqarsinnaapput.

*Imm. 4.* Allakkat nalinginnaasut nunaqarfinni illoqarfinnilu, allakkanik nalinginnaasunik agguaassiffiuneq ajortuni POST Greenlandimi taassumaluunniit suleqataanut aaneqarsinnaassapput.

*POST Greenlandip kisermaassisussaatitaanera*

§ 5. Allakkanik qaatiguuliorneqarsimasunik nunap iluani ingerlassinermut POST Greenland kisermaassisussaatitaavoq, taannalu imatut paasineqassaaq:

1) Imai apeqqutaatinnagit nassiussinerit qaatiguuliorneqarsimasut, taakku allakkap puusnaanut assigisaanulluunniit poorneqarsimappata.

2) Allakkatigut nalunaarutit qaatiguuliorneqarsimasut, taakkununga ilaallutik postkortit, inunnet ataasiakkaanut tunngasunik imallit.

*Imm. 2.* Allakkanik Danmarkimit, Savalimmiunit nunallu allat sinnerinit nassitsisunit nassiunneqartunik, Kalaallit Nunaannut qaatiguuliorneqarsimasunik, Kalaallit Nunaanni sumiiffinnut ingerlassinissamut, aamma allakkanik qaatiguuliorneqarsimasunik nunanut allanut Kalaallit Nunaannit nassitsisunit Danmarkimut, Savalimmiunut nunallu allat sinnerinut qaatiguuliorneqarsimasunik nassiunneqartunik ingerlassinissamut POST Greenland kisermaassisussaataaavoq.

*Imm. 3.* Allakkanik qaatiguuliorneqarsimasunik ingerlassinermik kisermaassisussaataaermut taakkuninnga katersineq, assartuineq agguassinerlu ilaatinneqarput.

**§ 6.** Kinaluunniit § 5-imi aalajangersakkat malingikkaluarlugit inatsisunik unioqqutitsinani nassiussanik POST Greenland avaqqullugu isumaginnissinaavoq, tamanna nammineq susassarisanik imaluunniit alla nassiussanik kiffartuutaq atorfeqarfignisaq sinnerlugu angallassinerruppat.

*Imm. 2.* Taamaaliortoqarsinnaavortaaq ingerlassineq pippat alla, ingerlassisup qaqtuguinnaq taamatorluinnaq ittumik ingerlassissuttaga kiffartuullugu.

**§ 7.** Nassiussinerit ataasiakkaat tamarmik POST Greenlandip nassiussinermut pineqartumut akigititai naapertorlugit kalaallit frimærkiutaanik atuuttunik pilersorneqarsimappata, § 5-imi aalajangersakkat apeqqutaatinnagit POST Greenland avaqqullugu inatsisit naapertorlugit ingerlanneqarsinnaapput.

*Imm. 2.* Frimærkit imm. 1 naapertorlugu atornerqartut atoqqinneqarsinnaangillat aammalu atorunnaarsinneqassallutik. Frimærkit aallaaviatigut ulloq naqissuserneqarnerat ilanngullugu atorunnaarsinneqassapput, tamannami nassiussap ulloq suna tiguneqarneranut uppernarsaatitut atuummat. Frimærki naqissuserneqarsimangitsoq paasineqarpat, taanna kuglepennimik, tusch-imik assigiisaanilluunniit piiarneqarsinnaangitsumik allassinnaasumik krydsilerlugu atorunnaarsinneqarsinnaavoq.

**§ 8.** Aqqusinerni allaniluunniit kikkut tamarmik aqqutigisinnaasaanni allakkanut nakkartitsisarfinnik inissinissamut POST Greenland kisermaassisussaataaavoq.

#### *Nassiussanik tigusiumangittarneq (re-mail)*

**§ 9.** Nassiussat qaatiguuliukkat Danmarkimeersut, Savalimmiuneersut nunanillu allaneersut, nassiussisup Kalaallit Nunaanni najugaqartup, imaluunniit Kalaallit Nunaanni najugaqartoq sinnerlugu inuup allap Danmarkimiit, Savalimmiuniit imaluunniit nunanit allaniit Kalaallit Nunaanni tiguisussamut ingerlateqqinneqarnissaa siunertaralugu nassiussassatut tunniussai Allakkerineq pillugu Nunarsuaq tamakkerlugu lsumaqtigiissummi tamanna pillugu malittarisassat naapertorlugit POST Greenlandimit itigartinneqarsinnaapput, tamatumani:

1) nassitsisup allakkeriviulluunniit allakkanik Kalaallit Nunaannut ingerlateqqitassanik isumaginnittuusup uppernarsarsinnaangippagu, nassiussat ilumut Kalaallit Nunaanniit nassiussisumit Kalaallit Nunaanni tiguisussamut nassiussaangitsut, imaluunniit,

2) nassitsisup allakkeriviulluunniit pineqartup nassiussassanut pineqartunut nunap iluani akit atuuttut malillugit akiliinissaq akuerippagu, imaluunniit nassiussat taamaattut pillugit allakkerivimmut

pineqartumut isumaqatigiissutaasimasinnaasut malillugit akiliinissaq akuerippagu.

*Imm. 2.* Nassitsisup allakkeriviulluunniit allakkanik Kalaallit Nunaanni ingerlateqqitassanik isumaginnittuusup imm. 1, nr. 2-mi allassimasut malillugit nassiussat akilerumangippagit, nassiussaq allakkerivimmuut isumaginnittuusumut utertinneqassanersoq imaluunniit suujunnaarsinneqassanersoq POST Greenlandip aalajangissavaa.

### **Kapitali 3**

#### *Allakkanik ammaasarneq*

**§ 10.** Nassiussat matoqqasut POST Greenlandimit isumagineqartut apuunneqarsinnaangitsut, allatut iliornikkut nassiussisumut tiguisussamulluunniit ingerlateqqinneqarsinnaangitsut, inunnit taamaaliornissamut POST Greenlandip qullersaqarfianit immikkut toqqakkanit ammarneqarsinnaapput misissorneqarsinnaallutillu. Nassiussat matoqqasut apuunneqarsinnaangitsut tassaapput, tassani tiguisusaaq imaluunniit nassiussisoq nassaarineqarsinnaasimanngitsoq.

*Imm. 2.* Pisariaqarpat nassiussap qanoq annertutigisumik ajoqusersimanera aalangiiffiginarlugu imaluunniit ajoqusernerup killilersimaarneqarnissaa anguniarlugu POST Greenlandip nassiussat ammarsinnaavai.

*Imm. 3.* Inuit imm. 1-imi taaneqartut uppernarsaammik atsiugaqassapput, tassanilu nassiussami ammarneqartumi nassiussisup imaluunniit tiguisusaaq aqqata najugaatalu saniatigut imaanik allanik piaaralutik atuugaqarsimannginnertik, kiisalu taamatut iliornerminni ilisimalikkatik susassaqqangitsunut allanut ilisimatitsissutigissanagit uppernarsassavaat.

### **Kapitali 4**

#### *Allakkerinermi sullissiviit ataqatigiit*

**§ 11.** Kalaallit Nunaanni najugaqarfinnit tamanit assartuussinermi ungasissutsit, pisariaqartitat aalajangersimasut innuttaasullu amerlassusiat eqqarsaatigalugit allakkerinermi sullissivinnik ataqatigiissunik atuisinnaanissaq POST Greenlandip isumagissavaa.

*Imm. 2.* § 11, imm. 1-imi illoqarfinni nunaqarfinniluunniit allakkerinermi sullissiveqangitsuni aaqqiissutissanik elektroniskiusunik atuinissaq akornusersimaneqanngilaq.

*Imm. 3.* POST Greenland pissutsit malillugit naammaginar tumik siusissusilimmik ilisimatitsereernikkut allakkerinermi sullissivimmik ammaanissamut Naalakkersuisunit peqquneqarsinnaavoq.

*Imm. 4.* POST Greenland allakkerinermi sullissivimmik matusinissamik kissaateqarpat, allakkerinermi sullissivinnik ataqatigiinnik allannguinissaq pillugu aalangiisoqqannginnerani, najukkami soqutigisaqartut tusarniaaffigineqarlutik ilaatinneqassapput. Sullissivimmik matusisoqartussaatiillugu siumoortumik nalunaaruteqarnissaq qaammatinit pingasunit sivikinnerussanngilaq.

*Imm. 5.* POST Greenland ukiumut ataasiarluni allakkerinermi sullissiviit ataqatigiit maannakkumut ineriartornera ineriartornissaanullu naatsorsuutigineqartut pillugit Ineqarnermut, Attaveqarnermut Angallannermullu Naalakkersuisoqarfimmuut nalunaaruteqartassaaq.

### **Kapitali 5**

#### *Allakkanik nakkartitsisarfinnut il.il. maleruagassat*

*Allakkanik nakkartitsisarfiit, allakkanik ikisisarfiit matukkut allakkanik nakkartitsisarfiit*

§ 12. Allakkanik nakkartitsisarfiittut isigineqarput allakkanik nakkartitsisarfiit sukanut, iikkanut, sallilikkanit ungalulianut assigisaannulluunniit naatitassanngorlugit ikkutaasut.

*Imm. 2.* Allakkanik nakkartitsisarfiit paarnaarneqarsinnaassapput.

*Imm. 3.* Allakkanik nakkartitsisarfiittut isigineqarput, inissiani quleriinni allakkanik nakkartitsisarfeqarfiit, allakkanik tunniussivissanut tamanut immikkut nakkartitsisarfillit.

*Imm. 4.* Allakkanik nakkartitsisarfiittut isigineqarput, allakkanik nakkartitsisarfiit kipparissut, tunniussivissat matuinut allakkanik nakkartitsivissatut ivertitat, aammalu allakkanik nakkartitsisarfinnut ataasiakkaanut allakkanik nakkartitsivissatut ivertitat.

*Imm. 5.* Allakkanik nakkartitsisarfiit imaluunniit matuni allakkanik nakkartitsivissatut ivertitat ataasiakkaat atit allagartaanik ikkussuivigineqassapput. Allakkanik nakkartitsisarfiit angissusissaannut piumasagaatit minnerpaaffissai ilanngussami takuneqarsinnaapput.

*Imm. 6.* POST Greenland allakkanik nakkartitsisarfiit atinik allagartalersorneqartarnerat pillugu aalajangersakkanik teknikkimut tunngasunik sukumiinerusunik aalajangersaassaaq.

*Allakkanik nakkartitsisarfiit, allakkanik nakkartitsisarfeqarfiit aamma matunut allakkanik nakkartitsivissatut ivertitat ikkussuunnissaannut maleruagassat*

§ 13. Allakkanik nakkartitsisarfiit inoqutigiit ataasiakkaat najugaannut isaariat eqqaannut inissinneqassapput.

*Imm. 2.* Illumi pineqartumi namminerisamik najugaqarfiit arlaliuppata, namminerisamik najugaqarfiit tamarmik immikkut allakkanik nakkartitsisarfinnik pilersorneqassapput.

*Imm. 3.* Ilaqutariinnut ataatsinut illu imaluunniit inissiaq najugaqarfissiaq ataaseq inoqutigiinnit arlalinnit najorneqarpat, inoqutigiillu taakku ataatsimut isaariaqarpat, najugaqatigiit tamanna isumaqatigiissutigisimappassuk allakkanik nakkartitsisarfik ataaseq inoqutigiinnit marluusunit amerlanerusunilluunniit ataatsimut atorneqarsinnaavoq. Allakkanik nakkartitsisarfik inoqutigiit tamarmik immikkut atiisa allagartaannik ivertitsivigineqarsimassaaq.

*Imm. 4.* Allakkanik nakkartitsisarfiit marluk amerlanerusulluunniit sanileriissillugit ikkunneqarsimassapput.

*Imm. 5.* Allakkanik nakkartitsisarfeqarfinnik ikkussuinissamut akisussaaffik illumik piginnittup isumagisassaraa.

§ 14. Illuni pingasut sinnerlugit tunniussivissaqartuni, 1. april 2005-ip kingorna sanaartornissamut akuersissut malillugu sananeqartuni allakkanik nakkartitsisarfeqarfinnik ikkussisoqassaaq.

*Imm. 2.* Allakkanik nakkartitsisarfeqarfiit sapinngisamik inini allerni illumut isaarissamut pingaarnermut qanittumut, agguasussap ajornaatsumik akornusersorneqaranilu iserfigisinnaasaanut, aammalu akornuteqarani allakkanik nakkartitsisarfeqarfinnut issoraaffigisinnaasaanut inissinneqassapput.

*Imm. 3.* Allakkanik nakkartitsisarfeqarfinni allakkanik nakkartitsisarfiit ataasiakkaat inissiat ataasiakkaat quleriiaarneri tulleriiaarnerilu malillugit inissititerneqassapput. Inini allerni inissiamut saamerlermut allakkanik nakkartitsisarfik, allakkanik nakkartitsisarfeqarfinmi allermut saamerlermut inissinneqassaaq.

Inini qullerni inissiamut talerperlermut allakkanik nakkartitsisarfik, allakkanik nakkartitsisarfeqarfimmi qullermut talerperlermut inissineqassaaq.

*Imm. 4.* Illumi piginnittup illumut isaariaq pingaarneq allakkanik nakkartitsisarfeqarfimmut isaariaasoq paarnaaqqasartunngorlugu iluarsisimappagu, allakkanik nakkartitsisarfeqarfik agguaassisussap matu ammaqqaanngikkaluarlugu silamiit allakkanik issoraavigisinnaasaanut ikkunneqassaaq.

*Imm. 5.* Allakkanik nakkartitsisarfeqarfinnik ikkussuinissamut akisussaaffik illumik piginnittup isumagisassaraa.

**§ 15.** POST Greenland allakkanik nakkartitsisarfiit inissiffissaat ikkunnissaallu pillugit aalajangersakkanik teknikkimut tunngasunik sukumiinerusunik aalajangersaassaaq.

**§ 16.** Matu innermut pitarnaveeqqutaappat, allakkanik nakkartitsisarfeqarnissaaq matumilu nakkartitsisarfimmik ikkussinissaaq inerteqqutaavoq.

*Imm. 2.* Allakkanik nakkartitsisarfeqarfinnik ikkussuinissamut akisussaaffik illumik piginnittup isumagisassaraa.

**§ 17.** Illuni pingasut sinnerlugit tunniussivissaqartuni, 1. april 2005-ip kingorna sanaartornissamut akuersissut malillugu sananeqartuni tunniussivissat tamarmik allakkanik nakkartitsisarfinnik matukkulluunniit allakkanik nakkartitsisarfinnik pilersorneqassapput, imaluunniit § 14 malillugu allakkanik nakkartitsisarfeqarfilersorneqassallutik.

*Imm. 2.* Ilaqutariinnut ataatsinut illuni, illuni affarleriinni, illuni sanileriaani/uiguleriaani il.il. allakkanik nakkartitsisarfinnik matukkulluunniit allakkanik nakkartitsisarfinnik pilersuisoqassaaq.

**§ 18.** § 14, imm. 1-imi aamma § 17-imi aalajangersakkat taamaallaat illoqarfinnut, allakkanik nalinginnaasunik agguaassiffiusartunut atuutsinneqarput.

## **Kapitali 6**

### *Allakkanik tunniussisarnermut maleruagassat*

**§ 19.** POST Greenlandip inoqutigiit allakkanik nakkartitsisarfinnik/allakkanik ikisisarfinnik/matukkut allakkanik nakkartitsisarfinnik ikkussuinissamut piomasaaqatinik naammassinnissimangitsut allakkanik agguaassisarnermi minissinnaavai.

**§ 20.** Inuit pitsorluttut allallu innarluutillit, namminneerlutik allakkanik nakkartitsisarfimminnik imaarsiartorsinnaangitsut allakkat inigisaminnut toqqaannartumik tunniunneqartarnissaannik immikkut akuersissuteqarfigineqarsinnaapput.

*Imm. 2.* Immikkut akuerineqarnissamut qinnuteqaat najukkami allakkeriviup pisortaanut tunniunneqassaaq.

## **Kapitali 7**

### *Taarsiissuteqartarneq - ataatsimut isigalugu*

§ 21. POST Greenland nassiussanik, § 3-mi ingerlassisussaataitanermut pisussaaffimmut ilaasunik kinguartoornermut atatillugu taarsiineq ajorpoq.

*Imm. 2.* Nassiussanut, ingerlassisussaataitanermut ilaasunut tammartunut innarlerneqartunullu piffissami nassiussap tiguneqarneraniit tunniunneqarneranut POST Greenland taarsiissuteqartarpoq, taamaattorli tak. imm. 3, § 22, imm. 1 aamma § 26, imm. 2.

*Imm. 3.* Tammartut innarlerneqarsimasulluunniit nassiussisup tungaaniit kukkuneramik sumiginnaanermilluunniit peqquteqarpata, nassiussap qanoq issusia, poortorneqannginnera imaluunniit amigartumik poortorneqarsimanagera, pissutsilluunniit POST Greenlandip pinngitsoortissinnaanngisai taakkulu kingunerit POST Greenlandimit taarsiissuteqarfigineqarneq ajorput.

*Taarsiissuteqartarnek – Nunap iluani nassiussat*

§ 22. Allakkanut nalinginnaasunut tammartunut innarlerneqarsimasunullu POST Greenland taarsiineq ajorpoq. Aamma taamaappoq imarisai tamakkiisumik ilaannaasumilluunniit annaaneqarsimappata.

*Imm. 2.* Poortukkanut nalinginnaasunut tammartut innarlerneqarsimasunulluunniit, imaluunniit imarisai tamakkiisumik ilaannaasumilluunniit annaaneqarsimasunut tunngatillugu POST Greenlandip annerpaamik aningaasartassamik aalajangersaalluni taarsiissuteqartussaataaneq killilersinnaavaa. Annerpaamik aningaasartaliunneqartut niuernermit tunngaviusussatut aalajangersakkani allassimassapput aammalu naleqquttuussallutik.

§ 23. Allakkat ataatsit poortugarluunniit nalinga nalunaarlugu nassiunneqartoq tamarpat innarlerneqarpalluunniit, imarisaaluunniit tamakkiisumik ilaannaasumilluunniit annaaneqarpat, annerpaamik naligitinneqartutut nalunaarutigineqartoq tunngavigalugu innarlerneqartoq taarserneqassaaq.

§ 24. Allakkat tammatsaalisat tamarpata nassiussisoq taarsiiffigineqassaaq. POST Greenland niuernermit tunngavissatut aalajangersakkamini taarsiissutissamut annerpaamik aningaasartaliussassamik naleqquttumik aalajangersaasinnaavoq.

*Imm. 2.* Allakkat tammatsaalisat innarlerneqarsimappata, imarisaaluunniit tamakkiisumik ilaannaasumilluunniit annaaneqarsimappata, POST Greenlandip annerpaamik aningaasaliiffissatut aalajangersagaata iluani innarlerneqartoq taarsiiffigineqassaaq.

*Taarsiissuteqartarnek – Danmarkimut Savalimmiunullu siumut utimullu aammalu nunat allat sinnerinut taakkunanngaanniillu nassiussat*

§ 25. Danmarkimut, Savalimmiunut nunanullu allanut siumut utimullu allakkerivikkut nassiussanut Nunarsuaq tamakkerlugu allakkat pillugit isumaqatigiisummi malittarisassat naapertorlugit taarsiisoqartassaaq.

*Imm. 2.* Kalaallit Nunaanniit Danmarkimut, Savaliummiunut imaluunniit nunanut allanut nassiussaq tamarpat innarlerneqarpalluunniit, imarisaaluunniit tamakkiisumik ilaannaasumilluunniit annaaneqarpat, piffissami ingerlassineq POST Greenlandimit isumagineqartillugu, nassiussisumut tamanna iluaqutaanerussappat nunap iluani nassiussinerit assigalugit taarsiisoqassaaq.

*Imm. 3.* Danmarkimiit, Savalimmiuniit imaluunniit nunanit allaniit nassiussaq innarlerneqarpat, piffissami ingerlassinermi POST Greenlandimit isumagineqartillugu, nassiussisumut tamanna iluaqutaanerussappat nunap iluani nassiussinerit assigalugit taarsiisoqassaaq.

#### *Taarsiissuteqarnerup annertussusaa*

**§ 26.** Tammartup nalinga imaluunniit nassiussap ajoquserneqarnermigut nalikillissutigisaa kisimik taarserneqarsinnaapput. Taarsiissutissat naatsorsorneqarneranni ajoqusiinerup nalaani pissusiusut tunngavagineqassapput.

*Imm. 2.* Iluaqutigisartakkanik iluaqutigisartagaqarunnaarneq, amigaateqalerneq, aningaasat nalikillinerisigut aningaasat annaasat imaluunniit ajoqusiinerup kingunerisaanik sunniutit allat taarsiiffiqarsinnaangillat.

*Imm. 3.* Nassiussaq tamarpat, taarsiissuteqarnerup saniatigut nassiussap allakkerivikkoortumik isumagineqarneranut akiliut taarserneqassaaq. Taamatuttaaq nassiussaq ajoquserneqarsimappat imaluunniit taassuma imarisai tamarmik imaluunniit imarisaasa ilaat tammarsimappata, tamannalu nassiussap utertinneqartariaqarneranut pissutaasimappat tamanna atuutissaaq.

#### *Taarsiiffiqarsimamut pisinnaatitaaffik*

**§ 27.** Nassiussanut aningaasanullu tammartunut, tassungalu nassiussap allakkerivikkoortumik isumagineqarneranut akiliutip utertinneqarnissaa ilanngullugu, POST Greenland taamaallaat taarsiisussaavoq, nassiussat POST Greenlandimut tunniunneqarsimasut imaluunniit aningaasat POST Greenlandimut akilerneqarsimasut uppersarneqarsinnaappat.

**§ 28.** POST Greenlandip taarsiisussaataitanera atorunnaassaaq, nassiussap tunniunneqarneraniit ukioq ataaseq qaangiutsinnagu piumasaqaat POST Greenlandimut nalunaarutigineqarsimangippat

**§ 29.** Taarsiineq atorunnaarsitsinermik kinguneqartumik nassiussisumut tunniunneqarsinnaavoq. Nassiussaq tiguisussumit tiguneqarsimappat, taarsiineq atorunnaarsitsinermik kinguneqartumik tassunga tunniunneqassaaq.

#### *Immikkut ittummik pisoqartillugu taarsiissuteqartarneq*

**§ 30.** POST Greenland pisuni ataasiakkaani, ajoqusiineq immikkoorluinnaq pisoqarnerani pisimappat, taamaattumillu POST Greenlandip taarsiisussaataitanera, kapitalimi matumani aalajangersarneqartoq atussallugu naammaginangitsutut nalilerneqarpat, taarsiisussaataitanermit maleruagassat nalinginnaasut malillugit taarsiisarsinnaavoq.

*Imm. 2.* Imm. 1 naapertorlugu aalajangiinerit Naalakkersuisunut maalaarutigineqarsinnaangillat.

## **Kapitali 8**

### *Niuernermi piumasaqaatit*

§ 31. POST Greenland niuernermi piumasaqaatinik tamanit takuneqarsinnaasunik suliaqassaaq, tassanilu atuisoq minnerpaamik makku pillugit ilisimatinneqassaaq:

- 1) POST Greenlandimut maalaaruteqarnissamut periarfissat.
- 2) Naammagittaalliorsinnaanermut pisoqalisoorsinnaanermullu maleruagassat.
- 3) Taarsiissuteqarnissamut piumasaqaatit, nalunaarummi matumani allassimasut, kiisalu tunisassianut sullissinernullu ataasiakkaanut atatillugu tunniussinissamut maleruagassat. Aammattaaq taarsiissuteqarnermi akiligassat amerlassusissaat uppersaatini assigisaannilu, POST Greenlandip nassiussassamik ingerlateqqitassamik tunniussisoqarneranut atatillugu tunniussaani ilisimatitsissutigineqassapput.

*Imm. 2.* Maleruagassat imaluunniit aalajangiinerit, nalunaarut manna imaluunniit allakkerineq pillugu Inatsisartut inatsisaat naapertorlugu POST Greenlandimit aalajangersarneqartut imaluunniit aalajangerneqartut niuernermi piumasaqaatini allassimassapput. Tamatumanili aalajangiinerit allakkerineq pillugu Inatsisartut inatsisaanni § 5 naapertorlugu aalajangiiffigineqartut pineqanngillat.

## Kapitali 9

### *Pineqaatissiinerit*

§ 32. § 10, imm. 3-p unioqqutinneqarnerani Kalaallit Nunaanni pinerluttulerinermik inatsit malillugu pillaatitut akiligassiisoqarsinnaavoq.

*Imm. 2.* Akilisitsissutit nalunaarut manna malillugit pineqaatissiissutigineqartut Nunap Karsianut tutsinneqartassapput.

### *Atuutilerfia*

§ 33. Nalunaarut manna 1. juli 2011 atuutilerpoq.

*Kalaallit Nunaanni Namminersorlutik Oqartussat, ulloq 24. juni 2011*

Jens B. Frederiksen

/

Steffen Ulrich-Lynge

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut